

## Zipiadores a Sèn Jan per i Mondiei

Dai 10 ai 15 de setember 11 artisç e vèlch student del Liceo artistich viventarà Poza e Meida te la 4<sup>a</sup> edizion del Simposie Toni Gross



L'artist de cèsa Paolo Costazza tolarà pèrt ence chest an al Simposie Toni Gross.

Èrt - L'é ruà a l'edizion numer 4 l'event artistich che dal 2012, ogni 2 egn, vegn endrezà a Poza per recordèr l'zipiador e alpinist Toni Gross, stat ence insegnant e diretor de l'Istitut d'Èrt ades Liceo artistich, ma ence per viventèr na sajón turistica che é dò a fenir via e sensibilisèr ghesc, jent del post e student de la Scola de Fascia a l'èrt e a la scultura tel legn.

Per duta la setemèna che vegn, dal Piaze de Comun de Sèn Jan e su per duta la strèda de Meida, enscin al Piaze de Sèn Nicolò, japede l Ski stadium che tel meis de firé che vegn ge darà alberch a la garejèdes di Campionat Mondiei junior de Schi Alpin 2019, 11 artisç se darà jù duc i dis per lurèr fora dal zirm na opera leèda apontin a la competizion mondièla en program te niense 6 meis, sul tem "Gregn evenc e mont".

Apede ai organisadores: la Scola Ladina de Fascia, l'Union di Ladins, l Comun de Sèn Jan e l'Istitut Cultural Ladin, l'event é sostegnù da n muie de istituzions e privac, pean via da la Region Trentin Sudtirol, e dapò l'APT de Fascia, dal Consorzie Eletrich de Poza, la 3 Frazions de Poza, Pera e Vich e l Comit

Organisador di Mondiei junior de schi alpin 2019.

I artisç, che ruà ence da fora da la Tèlia, ciaparà alberch ti Hotie Valacia e Meida/Anda e i podarà magnèr ti restoranc "Le Giare" e "Aida", ensema ence ai student del laboratorie didatich che vegn endrezà te Piaze de Comun, e ai professores Davide e Tiziano Deflorian, che ge stèsc dò.

Anter i 11 zipiadores l'é 3 femenes e 8 omegn; 2 l'é i fascegn, Paolo Costazza (venjidor l'an passà) e Stefania Pederiva, dapò l'é Gianluigi Zeni, Toni Venzo (venjidor de la pruma edizion) e Giovanni Capelletti, che à jà tout pèrt al Simposie e amò la spagnola Marta Fresneda, Ferdinando Gatto, Francesco Rizzardi, Marco Martello "Martalar", Giacomo Scandolo e Marta Zucchini, che i tol pèrt per la pruma outa. En sabeda ai 15 la operes cognarà esser fenides e les sarà valutèdes da na juria con a cef l'architet Gianni Pettena. Tel medemo di ence duta la jent podarà votèr l'opera che ge sà più bela e da les 6 da sera te sala del Consei de Comun de Sèn Jan sarà la premiazion, con i venjidores del prum, secont e terz pest e del pest del publich. (lg)